

奔走之網漏吞舟陽操陰縱以競徼厚利而
無尤貪冒之夫將寘力焉衛珠難哉是賦已
急而歛不休民已窮而盜日起吾未見海北
之能爲也余謏才承乏如蚩負山祇安素履
之貞祛孤臣孽子之慮毀譽不介其衷心跡
不暴於人迨於瓜期爲董董大較洗濯以禋
身廉訪以肅俗選帥以詰奸任怨以明法庶
幾哉庶幾哉顧題名近遍天下海北獨缺焉
夫先後諸公同聚一堂其居處食飲感慨閒

適靡不同之而未能屬聯以昭往鏡來是余之責也夫是余之責也夫乃以鍾大夫振雅所序次姓氏里爵命鐫諸石兼附忠告之誼俾後之君子以覽觀焉或不以予言爲僭者

廉郡修城記

巫鐸明

明朝輿圖一統守在四方故廉城之基實始于宋而恢廓之洪武初增築西臨于江者謂之舊城至宣德間擴東之枕於郊者謂之新城周匝合于丈奇而二濠環焉麗譙四峙串

樓千間畜衆容民崇文宣武其制之大者乎
嘉靖癸卯前守詹公文光以串樓繁峻歲爲
颶風摧毀採木陶瓦重困軍民迺集議定謀
更爲雉堞是謂陽城軍民之困始甦顧其工
務速成草率仍舊上而面磚不厚下而頑石
未更雨溢土解迭見傾頽雖續有修營亦惟
潤色而已歲庚戌太守何公師帥于廉雖重
承宣益嚴保障凡墉垣之傾圯者堅築之于
雉牆之顛覆者砌飾之厚瀉水之面磚易根

底之頑石不期速成而期于固守廉五載修築之功居多焉甲寅秋西寇連侵潯州南寧諸城公聞之惕然乃謀于二府陳公翰邑侯胡濟世衛侯范濟曰弭盜安民有官者之責也寇聲茲警思患豫防責將誰諉僉曰俞于是分飭軍民戍城巡守公於子夜躬歷閱之因請于兵備經公檄修樓櫓備器械飭內外巡舖又慮城北之郊曠僻而易致寇乃據其衝要創營設兵守之城之東南二郭門疎遠

亦易犯關爰命屬官分工監築改爲月城其
監于南者照磨周球典史黃嵩也監于東者
千戶相鐸陳一鳳王庭槐也異地一心勸工
興事故城維樓堞浹月告成居民恬息廉鄉
士夫暨衛僚咸偉公之績欲壽以碑屬鐸記
之鐸惟設險守國繭絲保障城池昉于古而
沿于今所係重矣守土者之責也今公修城
備警之功大著于廉如此其可泯耶然詹公
改城之善因是而彰且以告將來之守土者

公名御字子憲別號藍川福建福清人登嘉靖戊戌進士德信實而優于文章才敏達而利于經濟識者謂足以當廟堂之寄云

廉州府署記

饒秉鑑明

廉州古合浦之地僻在遐方與交趾接境蓋嶺南之邊郡也郡有治歲久多頽壞天順三年夏秉鑑自肇慶陞守是郡親政之初已有志于修葺值盜賊四出兼有採珠之命遂不果越明年珠乃停採又明年賊息於是鳩工

集材次第而修理之郡之廳堂暨儀門鼓樓
皆前太守朱公勤所建制度猶新惟補其門
壁易其朽壞增其從舍而已經歷照磨二廳
及東西司房則傾圯者多矣皆撤而新之郡
之萬益架閣二庫舊建于儀門之西邊因其
地淺窄四圍皆未立牆垣以故寇竊其所藏
今則遷于治之東解焉龍亭儀仗未有庫惟
貯之郡廳之東房深失敬上之禮今則遷其
庫于川堂之東其西又建退省軒以配之儀

門之外立廂房左右各六間鼓樓之前立榜
房東西凡三十二間又前爲平政門門外置
旌善申明二亭規模制度頗勝於前夫爲政
之道惟在乎正已以正乎人而已郡治之修
與否固不足爲輕重也然政令之所由出禮
法之所自行苟失其制則何以爲斯民之瞻
仰而啟其敬畏之心也哉此爲政者所以必
加乎修飾亦由其本以及其末之意也秉鑑
自來廉蓋已三載餘矣正已正人之道固未

能盡然其心未嘗忘也郡署之修又不過卽其舊而更新之而已又豈舍其本而逐其末哉斯舉也經始於天順五年七月落成于明年十一月又明年正月甲寅記

廉州府學記

黃佐明

國家宅有天下垂三百禩風教所孚暨于炎海荒逖絃誦蓋詵詵如也廉視海南爲邇其人多聰穎樸茂然府學故在東北隅地勢灣下士氣弗舒以故賓興漸鮮嘉靖乙未惠安

張公岳來知府事懼無以稱聖天子作人至
意乃程士業而砥礪之凡裂綴之文高虛之
說一切屏去士亦翕然從焉旣三載政成民
裕同知餘姚宋公同綦節推永嘉王公良弼
僉議以南門內元妙觀爽塏峻厚可居令訓
導廖景春朱衮達諸當路請兩易之覆議報
可首用金易民居五十間增廓其地併計匠
役木石之費僅一百餘兩經始以戊戌秋八
月卽觀故址中建先師廟前爲樂舞臺左右

翼以兩廡前爲戟門又前爲泮池又前爲櫺
星門自戟門右達則爲宰牲所廟後爲明倫
堂東西各爲齋東齋之南爲門出循東廡之
後爲儀門外通以長道爲儒學門其東爲啓
聖公祠又前爲敬一箴亭東爲名宦祠西爲
鄉賢祠又前爲門面門之東其內爲衙宇西
齋之後又各爲門亦內爲衙宇作以周垣耽
耽觀渠且立文明坊於通衢昭聖化也功未
告成而張公擢浙江學憲以去代者同安陳